

**■ COLUMNA**

# La Mammanossa

DA GISULA TSCHARNER\*

*N*ossa Mamma che Ti es  
en terra

*T*ia sabientscha profunda  
vegnia sanctifigada

*T*ia buntad sa derasia en  
ils gauds, sin ils èrs e  
prads e culms

*E*n las auas ed en l'aria,  
sco er en ils cors umans.

*I*l paun da mintgadi, dà el  
a tuts, Ti has avunda per  
mintgin

*A*ns perduna che nus Ta  
maltractain, cun vio-  
lenza e cun giavischs sfur-  
zonts

*S*co er nus Ta perdunain,  
sche Tes elements sa bit-  
tan en l'excess

*M*azzond bleras vitas,  
sco vulainsa perdunar  
er a quels che fan donn a  
nus.

*N*a collavorescha betg,  
sche l'empruvament da  
Ta dumagnar vegn sur nus

*M*a deliberescha nus da  
talas quaidas



*P*ertge che Ti es noss da-  
chasa, en Tai è la bellez-  
za, Ti has la savida veglia

*T*i prendas e das la vita,  
Tier, oz e damaun. Gra-  
zia.

**P**ropi na duvrassi nagin  
commentari pli tar  
quest'uraziun. Il Babnoss,  
l'uraziun da Jesus na vegn  
er betg commentà, gnanc  
Voss'uraziun privata na  
vegn commentada.  
Mintg'uraziun constat  
uschia sco ella è. Persunala  
e publica enina. Intima ed  
universala enina.

**L**'adressata u l'adressat  
n'è nagina persuna visi-  
bla, mabain ina dimensiun  
pli gronda-auta-profunda,  
il num concret nun impor-

ta. La pussaivladad dad  
urar, da far uraziun è insat-  
ge dal pli prezios ch'i dat en  
mintga vita umana! Ti sas  
avrir in isch da Ti'olma,  
cun urar, e suenter stat  
quest isch avert ina sgrim-  
ma, laschond entrar «aria  
frestga», in radi da glisch,  
10 grams confidenza.  
Uschè insatge che nun è  
pussaivel en in discurs tran-  
ter carstgauns. E Ti sas far  
uraziun dapertut ed adina,  
cunzunt cur che Ti es u ta  
sentas tut sulet/ta.

**M**i'uraziun preferida,  
la Mammanossa,  
m'è vegnida endament tan-  
tas giadas durant las ulti-  
mas emnas. Pertge? – Per-  
quai ch'jau sun ida a rim-  
nar las ervas selvadias da-  
vent da mez mars fin Pasca,  
admirond lur sanadad, lur  
brama da viver, l'intensitad  
dal verd selvadi (sper prads  
e funs sitgs-grischs). Min-  
tga spassegiada da rimnar è  
stada ina uraziun.

\* Gisula Tschärner stat si Feldis/Veul-  
den. Sco spirituala libra e rimnadra  
professionala è ella pensiunada. Ma  
la «stria veglia» sa focussescha anc  
a las «rosinas en la petta», cun plan-  
tas e cun spiritualitad.